

四庫全書

史部

欽定四庫全書

史部

蜀中廣記卷七十四至
六

詳校官編修臣翟槐

編修臣程嘉謨覆勘

總校官庶吉士臣何思鈞

校對官學正臣陳 未

謄錄舉人臣曹勲祖

謄錄監生臣曹錫爵

欽定四庫全書

蜀中廣記卷七十四

明 曹學佺 撰

神仙記第四

川南道

山海西經皇人之山皇水出焉又有中皇西皇之山按
峨眉圖經皇人中皇西皇山即所謂三峨矣五符經曰
皇人在峨眉山北絕巖之下蒼玉為屋黃帝往受真一

五牙之法馬路史曰泰壹氏是為皇人開圖挺紀執大同之制調大鴻之氣正神明之位者也是故九皇傳授以素其自然之所生復自然之解與天地之所始昔者神農常受事於泰壹小子而黃帝老子皆受要於泰壹元君蓋范元形嘗元味要會久視操法攬而長存者有兵法雜子陰陽雲氣黃治及泰壹之書兵法雲氣書傳間出而黃治雜子漢後不復見其書言黃帝謁峨眉見天真皇人拜求玉堂三一之道皇人曰而既已君統矣

又咨三一元乃朗抗乎古之聖人盍三辰立晷景封域
以判邦國山川以分陰陽寒暑以平歲道執以衛衆交
質以聚民備械以防姦車服以章等皆法乎天而鞠乎
有形者也天地有啓閉日星有薄失治亂有運會陰陽
有期數賢愚之蔽壽夭之質貴賤之事吉凶之故一成
而不變類氣浮於上而精氣萃於下性發乎天命成乎
人使聖人以為之紀是以聖人欲治天下必先身之立
權以聚財葵財以施智因智以制義繇義以出信仗信

以著衆用衆以行仁安仁以輔道迪道以保教善教以
政俗從俗以毓質崇質以恢行勤行以典禮制禮以定
情原情以道性復性以一德成德以叙命和命以安生
而天下自命治萬物自命得神志不勞而真一定矣子
以蕞爾之身而百夫之所為備故天和莫至悔吝屢戾
生殺失寒暑之宜動靜戾剛柔之節而貪欺終無所用
無乃已乎黃帝乃終身弗違而天下治其為教也至
矣水火大淵之事曷足言哉真文經曰昔天真皇人於

峨眉山中告皇帝曰一人之身一國之象也胃腹之位
猶宮室也四肢之列猶郊境也骨節之分猶百官也神
猶君也血猶民也能知治身則知治國矣夫愛其民所
以安其國愜其氣所以全其身民散則國亡氣竭則身
死亡不可復存死不可復生至人消未生之患治未病
之疾堅守之於無事之前不追之於既逝之後民難養
而易散氣難保而易失審威德者保其理割嗜欲者保
其無得不勤哉得不成哉

道迹經曰越雋郡邛都縣有小山名濛治山其高無踰
伊尹於此學道上有芝英金液草服之度世治應奎宿
黎州圖經昔人有駕牛採樵入蒙秦山見二老奕碁其
人係牛坐斧而觀局未終老人謂曰非汝久留之所樵
者起而斧柯已爛枯矣 按蒙秦治道家下品第七治
也云伊尹趙昇俱得道於此

彭祖古陸終氏第三子鑿鏗也自堯歷夏殷時封於天
彭周衰始浮游四方晚復入蜀抵武陽家焉按神仙傳

彭祖姓錢名鏗帝顓頊之玄孫也殷末已七百六十七
歲而不衰專好恬靜不卹世務不營名譽不飾車服唯
以養生治身為事殷王聞之以為大夫常稱疾不與政
事善於補導之術恒有少容然性沉重終不自言有道
亦不作詭惑變化鬼怪之事又有采女者亦少得道知
養性之方年二百七十歲視之如五六十殷王奉事之
於掖庭乃令采女往問道於彭祖請延年益壽之法具
授采女以教王王試之有驗屢欲秘之乃下令國中有

傳祖之道者誅又欲害祖以絕之祖知之乃去其後七十餘年有人于流沙國西見之按今彭山縣有彭祖塚蘇軾題詩曰猖狂戰國古神仙曳尾泥塗老更安厭世乘雲人不見空墳聊復葬衣冠又有燒香盤在縣治儀門外以石為之其形四方有臺高八尺許相傳為祖燒香祝延之地

列仙傳葛由者羌人也周成王時常刻木為羊賣之一旦騎羊入蜀蜀中王侯貴人追之上綏山綏山在峨眉

山西南其高無極隨之者不復還皆得仙道故里諺曰
得綏山一桃雖不得仙亦足以豪山下立祠數十處

靈仙篇云隄為郡東十餘里有道觀名東觀在深巖中
石壁四壅有顏道士居之觀殿有石函長三尺餘其上
鑿出鳥獸花卉文理纖妙鄰於鬼工而緘鑠極固泯然
無毫縷之隙里人相傳云是尹喜石函真人事跡顯於
紀傳詳矣將上昇之日以石函付門弟子約之曰此函
中有符籙慎不得啓啓之必有大禍於是郡人盡敬之

唐大厯中清河崔君為掾為守素以剛果自恃既至郡
間有尹真人函笑謂屬官曰辛垣平之詐見矣即詣之
且命破鑠顏道士曰真人遺教云啓吾函者且有大禍
幸君侯勿輕犯之崔君怒曰尹真人死千歲安得獨有
石函在乎吾不信於是命破其鑠久之而堅然不可動
崔君怒又以巨絙係函鼻用數十牛拽其絙鞭而驅之
石函遂開中有符錄數十軸以黃縑為幅丹書其文炳
然如新崔君既觀畢顧謂顏道士曰吾向者意函中有

奇寶故開而閱之今徒有符籙而已於是令緘鑰既歸
郡是夕暴卒後三日而寤其官屬將吏輩悉詣門訊焉
崔君曰吾甚慙未嘗聞神仙事前者偶開尹真人石函
果為冥官追攝初見一人衣紫衣至寢謂吾曰我吏於
冥司者也今奉命追君君固不可拒拒則禍益大矣宜
疾去吾始聞憂欲以辭免然不覺與使者俱出郡城僅行
五十里至冥司其冥官即故相呂諲也於吾友善相見
悲泣已而謂吾曰尹真人有石函在貴郡向為輒開今

奉上帝命召君按驗將如之何吾謝曰昏俗聾瞽不識神仙事故輒開真人函罪誠重然以三省之典不識不知者俱得原赦儻公寬之庶復自新耳諶曰帝命至嚴地府卑屑何敢違乎即招按掾出崔君籍有頃至白曰崔君餘位五任餘壽十五年今上帝有命折壽十三年盡奪其官諶曰折壽削官則固不可逃然可以為足下致三年假職優其廩祿用副吾子之託乃載拜謝言粗畢忽有雲氣謁然紅光自空而下諶及庭掾僕吏驚而

起曰天符下遂揖吾於一室中吾於隙間潛視之見譚具巾笏率庭掾分立於庭咸俛而拱雲中有一人紫衣金魚執一幅書宣道帝命於是譚及庭掾再拜受書便駕雲而上頃之始沒譚命吾出坐啓天符視之且歎且泣謂吾曰子識元三耶吾曰乃布衣之舊耳譚曰血屬無雉類可悲夫我雖然與元三為友至是亦無能拯之徒積悲歎而已語罷又泣既而命一吏送歸再拜而出與使者俱行入郡城解中已身卧于榻妻孥輩哭而環

之使者俱行俯於榻魂與身翕然而合遂寤家中云卒三日矣本郡以白廉使崔即治裝盡室往蜀具告於寧寧遂署攝副使月給俸錢二十萬時元載方知國政寧與載善書遺甚多聞遺之言懼其連坐因命親吏賣五百金賂載左右並得其書百餘幅皆焚之後月餘元載籍沒又二年崔亦終矣

列仙傳云陸通者楚狂接輿也好養生食素盧木實及蕪菁子遊諸名山住蜀峨眉山上人世世見之歷數百

年也 按晉皇甫謐作高士傳宋劉孝標注世說唐陳子昂賦感遇詩皆以接輿為避楚入蜀隱于峨眉今有接輿歌鳳臺焉

列仙傳曰丁次卿者欲還峨眉山語主人丁氏云當相為作漆以髹十枚盛水覆口從次唾之百日乃發皆成漆也

秦馬成子扶風人志欲脩道棄家訪師遇黃蓋童子授以胎元煉氣之法乃入蜀之鶴鳴山石洞中復遇異人

授以神丹曰氣為內丹藥為外丹今授子此丹服之當
列高真矣成子遂白日昇天

方輿勝覽白鶴山在邛州城西八里常璩曰臨邛名山
曰四明亦曰羣羊即今之白鶴也漢胡安嘗於山中乘
白鶴仙去弟子即其處為白鶴臺司馬相如從胡安先
生授易於此

列仙傳宿山圖隴西人馬踏折脚山中道人教服地黃
當歸羌活玄參一年病愈身輕追道人問自云五岳使

也能隨吾汝便不死山圖追隨六十餘年歸來行母服
復去莫知所之 按華陽國志宕渠縣出石蜜是山圖
所採也蜀都賦云丹砂蜜房山圖采而得道矣

輿地紀勝劉景鶴者漢景帝弟也性好修煉安期生謂
之曰南溪平蓋山有洞深數十里洞中冰結倒垂如玉
笋山之木葉上作符文汝往居焉景鶴遂來脩道及魏
武帝時始跨鶴仙去宋王宰於洞中見拋下琴劍作詩
有騎鶴仙人去不還却留琴劍在人間之句南溪志景

鶴仙人洞中琴國朝正德間猶藏在民間景氏及流賊亂遂被攜去

青神志云漢光武時有史通平者自會稽來蜀謁天皇真人得授三一之法及五行訣結廬於縣之北平山頂煉大丹龍虎成形餌之白日昇舉

宋蒲江令郭賢長秋觀石蟾記云縣東十里山名長秋觀號太清按圖誌漢唐王揚二真人栖隱之所觀有龍洞洞有石蟾鄉老相傳漢時縣主簿王興好道一旦遇

白蟾引至此山昇仙而去後人以白石琢蟾像置於洞中

眉州志云東南五十里大旺山頂有井現一物圓赤如斗形狀活動剖之甘香異常得一醫者即時羽化臨叩主簿聞之乘駒駘上山僅剩少許食之羽化駒駘舐餘漚亦化去後人呼為主簿山

寰宇記云瞿君字鵲子後漢犍為人入峨眉山四十年得仙乘白龍還家於平岡治白日上昇有繫龍橋在新

津縣東七里會安鄉尚存記稱瞿君得仙與家人別乘
龍於此 按新津志謂鵲子上昇在縣東南雪峰頂今
太清宮是其處 又按繫龍潭在彭山縣北四里舊經以
為瞿君武也龐籍詩云巢鳳閣邊勞遠夢繫龍灘下認
前題

洞仙傳云徐道季者少住鵲鳴山後遇真人謂曰夫學
道當中天青誅大厯跣雙白徊二赤此五神道之秘事
其語隱也大厯者三皇文是矣道季乃修行而得道焉

紫陽真人姓周諱義山字季通汝陰人也周丞相勃之
七世孫登峨眉山入空洞金府遇甯先生受大丹隱書
八稟十訣退登岷山遇陰先生受九赤班符又退登鶴
鳴山遇陽安君受金液丹經九鼎神丹圖

晉葛玄字孝先句容人天才超軼名振江南州郡辟為
掾固辭乃從左慈精思學道慈有異術能縮地脉得不
死藥玄欣受之嘗居昌州之峰腦山修煉餐松實咽黃
精自謂曰一炷清香一卷經一輪明月一張琴吾以此

自老馬忽謂人曰吾將不久此山招山下人譙以冰桃
碧藕乃去而之武都山得雄黃色如鶴冠喜曰吾丹砂
可成也後至洪雅之花溪居崑洞下道成乃上昇

洞仙傳云郭志生字通明朱提郡人晉元帝時云已四
百歲見之如五十許人有短卷書滿兩篋中常負之多
止烏傷張績家每歎曰兵荒方至毒流生民將以溝瀆
為棺材蒼蠅為孝子必然之期可為痛心後二年孫思
妖亂冬夏殺害及餓死者十不遺一忽謂績曰應亡為

吾備粗材器殞不須釘材亦不須埋但送山巖中以石
鎮材上後少日而死績謹依斯教經數日績親人自富
陽還見志生騎白鹿山中行作書與績也

周天和間合江有道士王法興者以補氣絕粒為事登
安樂山捫蘿陟險至絕頂昂而立默而坐甚愛之遂居
焉四方請謁甚衆舟車絡繹有齎金帛而獻者先生曰
金帛世重予無用此至拜饋甚勤不得已留之以經葺
佛宇偶夜半羣盜持刃入室左右奔駭竄匿先生儼然

安坐羣盜揮刃迫脅厲聲恐動先生瞑目不對羣盜異之疑湛頃刻顧謂盜曰爾輩斯來必有圖也藏中金帛非欲私諸已將為聖境修造之費爾輩欲取予無吝也羣盜挈諸物將奔散先生又曰聽吾一言而去此金帛將歸養父母給親戚可也苟為酒肉費久而耗竭必復有覲覲人神赫怒自陷憲章彼時欲改過自新無由得也豈若留負販以保厥身羣盜驚顧相謂曰逼之不懼取之不吝又訓我以慈愛誠真人矣遂投金帛於地拜

伏而去一日與諸弟子訣吾當向綿竹去復來脫一鳥置
榻下端坐解面如生弟子為具棺殮積薪將化之舉棺
覺輕乃復啓視惟所脫鳥在衆驚歎暮有樵夫自山前
來逢道士去聞者愕然已道士後身生漢州綿竹縣劉
氏是為劉真人

隋劉真人諱珍字善慶綿竹人前身即合江道士王法
興也齟齬風神秀異未嘗作兒戲迨十餘歲即慕道父
母不能止嘗厭屢市乃曰非雲岩石竇無以養神非金

虎木龍無以昇天內藥既成外丹必應曾憶安樂山峰
巒峭峻神仙境也將復往焉歷戎瀘至合江顧瞻安樂
曰戎之平蓋山濁而不清瀘之方山清而不秀此地清
秀可託因謁邑大夫洎耆舊詢安樂已事一叟曰安樂
自王法興大化後堂殿荒落不可往先生拘髀曰吾全
真故處也雖蹈水火不避遂傍谿逕披荆棘而上徧登
遺址完葺彌月芟藤蔓闢舊洞以居焉邑之宿儒耆獻
深入烟蘿尋至絕頂謁之有老人起而曰吾少時從父

老游此山謁王真人儼若先生先生頷之劉即王也絕
粒垂數十年一日召左右請耆庶士人皆至先生曰吾
累生積功今已畢矣四月十五日吾當升天設棚高二
丈七尺四面懸絕無梯先生至其所一躍而上北面拜
而跪如有伺候須臾東方紫雲縹緲有音樂聲乘雲而
去時開皇十九年四月十五日也是日降於隋文帝殿
帝驚訝曰何神降於此先生具言其所來言訖辭去帝
下殿仰祝之迺遽不見駭嘆異事勅使馳騎合江縣問

實本縣實錄以聞帝令出省庫錢於仁壽間修成上中
下三觀仍賜田土禁樵採天復元年元濟奉詔來牧因
覽圖經知安樂山在合江縣迺劉先生修道之處具狀
奏乞聖旨蒙降勅命依奏施行元濟據圖籍之所傳慮
勝事之或泯次為傳記用廣其聞天祐四年瀘州守張
元濟撰 按瀘州圖經開皇中劉真人在瀘州安樂山
忽取所齋道經鐘磬封于石室曰後六十年當有聖君
取之及唐高宗天寶間果遣使取丹經鐘磬以進顯慶

中李淑撰三觀記贈其事

隋趙昱字仲明與兄晃俱隱青城山從事道士李珣大業末煬帝聞其名徵召不赴督讓益州太守臧賸強起昱至京師縻以上爵不就乞蜀郡從之拜嘉州守時犍為潭中有老蛟為害截沒舟船蜀人患之昱莅政五月方欲除之會使人往青城山製藥渡江溺

原缺

欽定四庫全書



卷七十四

燉迅乎電

騶倏煉景逝飄渾星遊是日下還只此丹邱舒闡茶壘
轡策靈州太空逸麟羈絡豈由閭圃閒羽羅絙不由洞
天皓朗爐鞴經秋此即真人所書矣 按酉陽雜俎玄
宗幸蜀夢思邈乞武都雄黃乃命中使齎雄黃十斤送
於峨眉頂上中使上山未半見一人幅巾被褐鬚鬢皓
白二童青衣丸髻夾侍立屏風側以手指大盤石曰可
致藥於此上有表錄上皇帝中使視石上朱書百餘字

遂錄之隨寫隨滅寫畢石上無復字矣須臾白氣漫起
因忽不見 又按法苑珠林王蜀時有僧居成都大慈
寺恒誦法華經嘗入青城大面山採藥泂溪越險忽然
雲霧四起不知所適有頃見一翁揖之序寒暄翁曰莊
舍不遠略迂神足得否僧曰甚願少頃雲散見一宅宇
陰森既近翁曰且先報莊主人僧入門覩事皆非凡調
問曰還齋否曰未遂焚香且覺非常鬱淳請念所業經
此僧朗聲誦經翁令誦徹部所饋齋饌皆大慈寺前食

物齋畢青衣負竹器以香草薦之迺施錢五貫為師市胡餅之費翁合掌送出問人或云孫思邈先生此僧到寺已經月餘矣其錢將入寺則黃金貨泉也王主聞之收金錢別給錢五百貫其僧散施之後嘉州羅目縣復有人遇孫山人賃驢不償直訴縣乞追攝縣令驚恠出錢代償其人居山下及出縣路見思邈先生取錢二百以授之曰吾元伺汝於此何遽恠乎

集仙錄云黃觀福者雅州百丈縣民之女也自幼不食

葷血好清淨家貧無香取栢子焚之每凝然靜坐經日
不以為倦或食栢葉飲水自給不嗜五谷既笄父母欲
嫁之忽謂父母曰門首水中極有異物隨往看水果洶
湧不息乃自投水中良久不出父母撈攬得一木像天
尊古昔所製金彩已駁狀貌與女無異水即澄清無復
他物便以木像置於路側號泣驚異而歸其母時來視
之憶念不已忽有彩雲仙樂導衛觀福與女伴三人下
其庭中謂父母曰女本上清仙人也有小過謫在人間

年限既畢復歸上天無至憂念同來三人一是玉皇侍女一是大帝侍晨女一是上清侍女也今年此地疾疫死者甚多幸移家益州以避凶歲即留金數餅昇天而去父母如其言移之蜀郡其歲疫毒雅地尤甚十喪三四即麟德之年矣今俗呼為黃冠佛蓋以不識天尊像仍是相傳語訛以黃觀福為黃觀佛也

總志云唐景雲中京兆道人楊昭慶篤尚玄虛入蜀巡遊至北平化嘆曰史先生得真一之道修之于已白日

升天後豈無繼者乎遂居青神之遊仙觀三十餘年感
五嶽丈人希受真君授以朱明龍文得尸解

唐成無為者開元間丹稜女道士也自幼慕道出家誓
死不嫁卜居龍鶴山下調形鍊骨却粒茹芝年踰知命
昇仙而去栖隱之處有龍洞遺跡羽士趙仙舟奏進其
衣履見松栢山碑記本記又載眉山李煉師天寶九載
得道在松栢山云

集仙錄云楊正見者眉州通義縣民楊寵女也幼而聰

悟雅尚清虛既笄父母字同郡王生王亦鉅富好賓客
一旦舅姑會親舊市魚使正見為繪賓客博戲於廳日
昃而盤饌未備正見憐魚之生盆中戲弄之竟不忍殺
既晡矣舅姑促責食遲正見懼竄於鄰里但行野徑中
忽數十里至一山舍有女冠在焉具以其由白之女冠
曰子有仁愍好生之心可教也因留止之山舍在蒲江
縣主簿化側其居無水常使正見汲澗泉女冠素不食
為正見故時出山外求糧以贍之如是數年正見恭慎

勤恪執弟子之禮未嘗虧怠忽於泉所有一嬰兒潔白可愛纔及歲餘見人喜且笑正見抱而撫之以為常矣由是汲水歸遲者數四女冠疑怪而問之正見以事白女冠曰若復然必抱兒徑來吾欲一見耳自是月餘正見汲泉此兒復出因抱之而歸漸近家兒已殭矣視之但若草樹根重數斤女冠見而識之乃茯苓也命潔甌以蒸之會山中糧盡女冠出求糧給正見柴三小束諭曰甌中之物但盡此三束柴火勿輒視之女冠出山期

一夕而還是夕大風雨山水溢道阻數日不歸正見食盡餓甚聞甌中物香因竊食之數日都盡女冠方歸聞之歎曰神仙固當有定分向不過雨水壞道汝豈得盡食靈藥乎吾師常云此山有人形茯苓食者白日昇天吾伺之二十年矣汝今遇而食之真得道者也自是正見容狀益異光彩射人常有羣仙降其室與之論真宮天府之事歲餘白日昇天即開元二十一年壬申十一月三日也嘗謂其師曰得食靈藥即日便合登仙所以

遲迴者幼年之時見父母棟稅錢輸官有明淨圓好者
竊藏二文翫之以此為隱藏官錢過罰居人間更一年
耳其昇天處即今邛州蒲江縣主簿化也汲水之處存
焉 按臨邛圖經楊正見鄉民楊寵之女年三十無家
開元時入蒲江長秋山修煉墾田艱水忽見白牛語曰
我伏地下有神水可穿文餘得水正見如其言果有湧
泉後得道上昇羽士趙仙甫以事聞進其衣履并跡見存

仙傳拾遺云許老翁者不知何許人也隱於峨眉山唐

天寶中益州士曹柳某妻李氏容色絕代時節使章仇兼瓊新得吐蕃安戎城差柳送物至城所三歲李在官舍重門未嘗啓忽有裴兵曹詣門云是李之中表丈人李云無裴家親門不令啓裴固言李小名兼說其中外氏族李方令開門到拜因致食裴人質甚雅因問柳郎去幾時荅云已三載矣裴云三載義絕古人所言今欲如何且丈人與子業因合為伉儷願無拒此禮也而竟為裴丈所妻似不由人可否裴兵曹者亦既娶矣而章

仇公聞李之姿容亦欲窺覷乃令夫人特設筵會屈府
縣之妻罔不畢集唯李以夫壻在遠辭焉章仇之妻必
得一見云但來無苦辭李懼責遂行着黃羅銀泥裙五
暈羅銀泥衫子單絲羅地銀泥帔子蓋益部之盛服也
裴顧衣而歎曰世間乃華如此衣服顧謂小僕可歸開
箱取第三衣來李云不與第一而與第三何也裴曰第
三乃非人世所有矣須臾衣至異香滿室裴再眎笑謂
小僕衣服當須爾耶老章仇何知但恐許老翁知耳乃

登車詣節度家既入夫人乃坐客悉皆降階致禮李既服天衣貌益殊異觀者愛之坐定夫人令白章仇章仇徑來入院戒衆勿起見李服色歎息數四因借帔以觀之知非人間物試之水火亦不焚汙因留詰問之李具陳本末使人至裴居處則不見矣兼瓊乃易其衣而進并奏許老翁之事敕令以計須求許老章仇意疑仙者往來必在藥肆因令藥師候其出處居四日得之初有小童詣肆市藥藥師意是其徒乃以惡藥與之小童往

而復來且囑云大人怒藥不佳欲見捶撻因問大人為誰童子云許老翁也藥師甚喜引童白府章仇令勁捷百人卒更五十人隨童詣山且申敕令山峰巉絕衆莫能上童乃自下大呼須臾老翁出石壁上問何故領爾許人來童具白其事諸吏叩頭求哀云大夫深慕翁已表矣久之翁亦至焉章仇見之再拜俯伏翁無敬色勤懃不已以親吏隨侍許謂吏曰返府我亦隨至及吏問娶李者是誰翁曰此是上元夫人衣庫之官俗情未盡

耳章仇求謁帝許云往亦不難乃與奏事者尅期至長
安先期而至有詔引見玄宗致禮甚恭敬既坐問云庫
官有罪天上知否翁云已被流作人間一國主矣又問
之竟何如許云設席施衣於清淨之所當有人來取上
敕如其言初不見人俄有旋風卷衣入雲顧矚之間亦
失許翁所在

靈驗經云嘉州刺史張評士中年已來夫婦俱患瞽疾
求方術者不能致退居別墅杜門自責唯禱醮星辰以

祈所祐歲久家業漸虛精誠不退元和七年壬辰八月
十七日有書生詣門請謁家人曰主公夫婦抱疾不接
賓客久矣書生曰吾雖是書生亦醫術人間使君有疾
故此來爾家人入白評士欣然曰久疾不接賓客客既
有方藥願垂相惠書生曰但一見使君自有良藥評士
聞之扶疾相見已書生曰此疾不假藥餌明日請丁夫
十人鍬鍤之屬為開一井眼當自然痊愈評士如其言
而備焉書生即選勝地自晨穿一井至夕見水令評士

齋潔焚香志心取水洗之評士眼疾即時明淨平復如初夫婦感而謝之厚遺金帛書生辭曰焉用為吾非世間人太白星官也以子抱疾數年不忘於道精心禱醮上感星辰五帝星君使我降授此術以荅子修奉之心金帛之遺非吾所要因留此法令傳教世人以救疾苦用增陰德其法曰子午之年五月酉戌日十一月卯辰日丑未之年八月戌亥日十二月辰巳日寅申之年七月亥子日正月己午日卯酉之年八月子丑日二月午

未日辰戌之年三月寅丑日九月未申日己亥之年十月申酉日四月寅卯日取其方位年月日時即為福地浚井及泉必有良效評士再拜受之言託書生上昇而去

神仙感遇傳云僧悟玄不知何許人也雖寓跡緇褐而潛心求道自三江五嶺黔楚諸名山無不遊歷每遇洞府必造之焉入峨眉山聞有七十二洞自雷洞外諸崖石室邃穴之間無所遺焉偶歇於巨木下有老叟自下而上相挹而坐問其所詣悟玄具述尋訪名山靈洞之

事叟曰名山大川皆有洞穴不知名字不可輒入訪須得洞庭記嶽瀆經審其所屬定其名字的其里數必知神仙所居與經記相合然後可遊耳不然有風雷洞鬼神洞地獄洞龍蛇洞誤入其中害及性命求益反損深可戒也悟玄驚駭謝教因問曰今峨眉洞天定可遊否叟曰神仙之事吾不敢多言但謁洞主自可問耳悟玄又問洞主為誰叟曰洞主姓張今在嘉州市門屠肉為事中年而肥者是也語訖別去悟玄復至市門求之張

生在焉以前事告之張曰無多言也命其妻烹肉與悟
玄為饌以肉三器與之悟玄辭以不食肉久矣張曰遊
山須得煞力不致飢乏然後可行若不食此無由得到
勉之再三悟玄亦心自計度恐是神仙所試不敢拒命
食盡二器厭飫彌甚張又勸之固不能食矣食訖求去
張伏地拾一瓦子以授之曰入山至某峰下值某洞門
有長松下有迴溪上有峭壁此天真皇人所居也以瓦
扣之三二十聲門開則入每遇門即扣之則神仙之境

可到矣。依教入山，果得洞，與所指無異。以瓦扣之，良久，峭壁中開。洞內高廣平穩，可通車馬。兩面皆青石，瑩潔。時有懸泉流，渠夾路左右。凡行十餘里，又值一門，扣之復開。大而平濶，往往見天花夾道，及禽鳥花卉之異。人物往來之盛，多是名姝麗人、仙童玉女。時有仙官道士，部伍車騎，憧憧不絕。又遇一門，扣之，彌切瓦片，碎盡，門竟不開。久之，聞震霆之音，疑是山石摧陷，惶懼而出，奔走三十步，已在洞門外。無復來時景趣矣。復訪洞主，已經五十步。

月餘屠肆宛然而張生已死十許日自此志棲名山誓
求度世入峨眉不知所之

感遇傳云宋文才者眉州彭山縣人也少年時與鄉里
數人遊峨眉山已及絕頂偶遺其所齋巾履步求之去
伴稍遠見一老人引之徐行皆廣陌平原奇花珍木數
百步乃到宮闕玉砌瓊堂雲樓霞館非世人所覩老人
引登萼臺顧望羣峰棊列於地有道士奕棊青童採藥
清渠瀨石靈鶴翔空文才驚駭問老人曰此為何處荅

曰名山小洞有三十六天此峨眉洞天真仙所居第二十三天也揖坐之際有人連呼文才名老人曰同侶相求不可久住他年復求可耳命侍童引至門外與同侶相見迴顧失仙宮所在同侶曰相失已半月矣每日來求今日乃得相見文才具述所遇之異焉

太平廣記昔有叟遇一道人於息臺山攜酒偕其子共飲之道人因取籍檢視謂其子壽年止十八叟哀求之遂舉筆改為八十其後子壽果如其言 按息臺山在

眉州治西東館鎮之北

志云牟羅漢眉山人名安以廂兵隸倅廳如岷山陟上清坂苦饑忽遇髯者顧笑曰汝饑何不食栢子邪摘栢子投其口顧髯者不復見矣遂不火食亦往往通老莊偶一日江水暴漲舟不可行或戲指其笠曰乘此渡可乎牟遂置笠水面跌坐其上截江以濟觀者異之

張遠霄眉州人一日見老人持竹弓一鐵彈三質錢三百文張無靳色老人曰吾彈可辟疫癘宜寶而用之再

見老人遂授以度世法熟視其目中各有兩瞳子後往
白鶴山垂釣西湖峰上見一老人叩之不荅旁一人指
曰此君之師四目老翁也不記授竹弓鐵彈時耶張大
悟 按輿地紀勝仙人張遠霄故宅在眉州治西北宋
時園中雙檜猶存李石詩野草閒花不記年亭亭雙檜
欲叅天讀書却得騎鯨老買藥來尋跨鶴仙 又按臨
邛志白鶴山盧舍那院異時張遠霄仙蹟俱在遠霄生
眉山自號四郎以靈符神彈救世病苦忽一日書符於

壁如四目老翁狀符就落壁隱身不見人即其地立祠焉

江安志胡羊道人容貌奇異美髯明眸唐季在縣東南
七里山峰絕頂屏世事專志修煉自號胡羊嘗適梓州
見獄吏王昌遇有陰德投以仙訣丹成戒以百日後方
可服昌遇如其言未幾郡遣來瀘南計事畢夜遇道人
於江濱投以馬使乘之馬行如飛叱雞鳴落梓州五里
石崖上馬化為龍入江去至州檄印尚未乾守疑之繫

獄遣人驗明始釋果百日乃餌丹賦詩舉家於大中
末白日飛升道人尋亦仙去後人因名其山為胡羊山
所棲處曰胡羊觀灶跡見存今重修為青雲觀潼川有
馬落崖古碑存

感遇傳云王從玘者宦官也蜀主初節制邛蜀黎雅為
永平軍從玘為監軍判官自是收剋成都罷鎮為郡從
玘栖寓蜀中十餘年食貧好善不常厥居適邛市有老
叟睨而視之曰將有大厄濱于死所探懷袖中小瓢以

丹砂十四粒與之曰餌此旬中而髯生勿為怪也可以
免難矣服之三五日髯果生焉丹餘詔誅宦官從玘亦
在其數人或勸其遁去荅曰君父之命豈可逃乎俛首
赴繫太守哀而上請蜀王特宥之視其狀貌且于思
乃放還

錄異記云嘉州夾江令檢校工部尚書朱播嘗居官得
疾四支不能運用每轉側皆須數人扶舁以為風廢藥
餌攻之不効忽眼痛且癰晝夜煩楚又數日俄而渴作

嗜水及湯飲不知石斗之量又數日狂憤憤若有所覩
賴其沉頓不能轉動若不然亦將披髮裸走無所畏憚
矣旬日之中四疾相屬風露之危期在旦夕忽見七仙
人列坐在前纔長五六寸衣帔冠服眉目髭髮厯厯分
明五人相倚而坐二人兩畔橫坐播心自思之正坐即
有橫坐如何忽聞側畔空中有人應曰既為仙人無所
不可何怪橫坐聞訖亦不見所語之人七仙人亦復不
見自此常覺有人為握搦手足捫拍背膊所疾漸損其

日所嗜冷水湯飲頓減一半如是三五日便能主持公
事祇附賓客所疾全愈因畫北斗七星真人供養焉

東坡志林云吾八歲入小學以道士張易簡為師童子
幾百人師獨稱吾與陳太初者太初眉山市井人子也
余稍長學日益遂第進士制策而太初乃為郡小吏其
後余謫居黃州有眉山道士陸惟忠自蜀來云太初已
尸解矣蜀人吳師道為漢州太守太初往客焉正歲日
見師道求衣食錢物且告別持所得盡與市人貧者反

坐於戟門下遂卒師道使卒舁往野外焚之卒罵曰何物道士使吾正旦舁死人太初微笑開目曰不復煩汝步自戟門至金雁橋下跌坐而逝焚之舉城人見烟焰上眇眇焉有一陳道人也

東坡陸道士墓誌銘云道士陸惟忠字子厚眉山人家世為黃冠師子厚獨狷潔精苦不容於其徒去之遠游始見余黃州出所作詩論內外丹指略蓋自以為決不死者然余嘗告之曰子神清而骨寒其清可以仙其寒

亦足以死其後十五年復來見余惠州則得瘦疾骨見
衣表然詩益工論內外丹益精曰吾真坐寒而死矣每
從事於養生輒有以敗之類物有害吾生者余曰然子若
死必復為道士以究此志余時適得美石如黑玉曰當
以是志子墓子厚笑曰幸甚久之子厚去余之河源開
元觀客於縣令馮祖仁而余亦謫海南是歲五月十九
日竟以疾卒年五十祖仁葬之觀後蓋紹聖四年也銘
曰嗚呼多藝此黃冠詩碁醫卜內外丹無求於世宜堅

完龜飢鶴瘦終難安哀哉六巧坐一寒祝子復來少宏
寬毋復清詩助疴酸龍虎丸成無或姦往駕赤螭駢青
鸞

東坡衆妙堂記云眉山道士張易簡教小學常百人予
幼時亦與焉居天慶觀北極院予蓋從之三年謫居海
南一日夢至其處見張道士如平昔汎治庭宇若有所
待者曰老先生且至其徒有誦老子者曰玄之又玄衆
妙之門予曰妙一而已容有衆乎道士笑曰一已陋矣

何妙之有若審妙也雖衆可也因指灑水薙州者曰是
各一妙也予復視之則二人者手若風雨而步中規矩
蓋煥然霧除霍然雲消予驚歎曰妙蓋至此乎庖丁之理
解郢人之鼻斲信矣二人者釋技而上曰子未覩真妙
庖郢非其人也是技與道相半習與空相會非無挾而
徑造者也子亦見夫蜩與雞乎夫蜩登木而號不知止
也夫雞俯首而啄不知仰也其固也如此然至蛻與伏
也則無視無聽無飢無渴默化於荒忽之中候伺於毫

髮之間雖聖知不及也是豈技與習之助乎二人者出道士曰子少安須老先生至而問焉二人者顧曰先生未必知也子往見蜩與雞而問之可以養生可以長年廣州道士崇道大師何德順學道而至於妙者也故榜其堂曰衆妙書來海南求文以記之因以夢中語為記紹聖六年三月十五日蜀人蘇軾書

輿地紀勝云富順太平興國觀相傳山有異人紹興中玉籍彥室嘗行山間遇道人款話以腹枵告歸道人笑

以肘捫其腹三彥室頓覺異常歸即辟穀踰年復夢見道人啖以棗呼之過溪彥室曰吾親在此乃止

紀勝云李夔字虞卿既葬父母廬墓有白兔白烏馴擾遇異人與夔語夔不答題墓石云口口思量到此間先知巽六下南山生來自秀培來秀到底恩深有分攀世人曉得斯言者去會蓬萊寶洞間

蜀中廣記卷七十四

欽定四庫全書

蜀中廣記卷七十五

明 曹學佺 撰

神仙記第五

川東道

集仙傳云雲華夫人王母第二十三女太真王夫人之妹也名瑤姬受徊風混合萬景鍊神飛化之道嘗遊東海還過江上有巫山焉峰巖挺拔林壑幽麗巨石如壇

留連久之時大禹理水駐山下大風卒至崖振谷隕不可制與夫人相值拜而求助即敕侍女授禹策召鬼神之圖書命其神狂章虞余黃魔大翳庚辰童律等助禹斬石䟽波決塞導阨以循其流禹拜而謝焉禹嘗詣夫人崇獻之嶺顧眄之際化而為石或倏然飛騰散為輕雲或油然而止聚為夕雨或化遊龍或為翔鶴千態萬狀不可親也禹疑其狡獪怪誕非真仙也問諸童律童律曰天地之本者道也運道之用者聖也聖之品次真

人仙人矣其有稟氣成真不脩而得道者木公金母是也蓋二氣之祖宗陰陽之原本仙真之主宰造化之元先雲華夫人金母之女也昔師三元道君受上清寶經素書於紫清闕下為雲華上官夫人主玄教童真之士理玉映之臺隱見變化蓋其常也亦由凝氣成真與道合體非寓胎稟化之形是西華少陰之氣也且氣之彌綸天地經營動植大包造化細入毫髮在人為人在物為物豈止於雲雨龍鶴飛鴻騰鳳哉禹然之復往詣焉

忽見雲樓玉臺宮闕森然暨夫靈官侍衛不可名識師
子抱闕天馬啓塗毒龍電獸八威備軒夫人宴坐於瑤
臺之上禹稽首問道召禹使坐而言曰夫聖世肇興剖
太混之一樸散為億萬之體發大蘊之一苞散為無窮
之物故步三光而立乎晷景封九域而制乎邦國刻漏
以分晝夜寒暑以成歲紀允離以正方面山川以分陰
陽城郭以聚人民器械以衛衆志章服以表貴賤禾黍
以備凶歉凡此之制上稟乎星辰而取法乎神真下以

養於有形之物物也是故日月有幽明生殺有寒暑雷
電有出入之期風雨有動靜之常類氣浮乎上而衆精
散於下廢興之數治亂之運賢愚之質善惡之性剛柔
之氣壽夭之命貴賤之位尊卑之敘吉凶之感窮達之
期凡此者稟之於道懸之於天而聖人爲之紀也性發
乎天而命成乎人立之者天行之者道道存則有道去
則無非道而物不可存也非脩而道不可致也玄老有
言致虛極守靜篤萬物將自復復謂歸於道而常存也

道之用也變化萬端而不失其一是故天參玄玄地參
混黃人參道德去此之外非道也哉長久之要者天保
其玄地守其物人養其氣所以全也則我命在我非天
地殺之鬼神害之失道而自逝也志乎哉勤乎哉子之
功及於物矣勤逮於民矣善格乎天矣而未聞至道之
要也吾昔於紫清之闕受書寶而勤之我師三元道君
曰上真內經天真所寶封之金臺佩入太微則雲輪上
征神武抱闕振衣瑤房邀宴希林長招仙公右栖白山

而下眇太空汎乎天津則乘雲騁龍遊此名山則真人
詣房萬神奉衛山精伺迎動遊八景玉輪靜則宴處金
堂亦謂之太上玉珮金璫之妙文也汝將欲越巨海而
無颿輪渡飛砂而無雲軒陟阨塗而無所輦涉泥波而
無所乘陸則困於遠絕水則懼於漂淪將何以遵百谷
而濬萬川也危乎悠哉太上愍汝之志亦將授以靈寶
真文陸策虎豹水制蛟龍斬馘千邪檢馭羣凶以成汝
之功也其在乎陽明之天耶吾所受寶書亦可以出入

水火嘯咤幽冥收束虎豹呼召六丁隱淪八地顛倒五
星久視存身與天相傾也因命侍女陵容華出丹玉之
笈開上清寶文以授禹拜受而去又得庚辰虞余之助
遂能導波決川以成其功奠五岳別九州而天錫玄珪
以為紫庭真人也其後楚大夫宋玉以其事言於襄王
王不能訪道要以求長生築臺於高唐之館曰陽臺之
宮以祀之宋玉作神女賦以寓情荒淫託詞蕪穢高真
上仙豈可誣而降之耶有祠在山下世謂之大仙隔岸

有神女之石即所化也復有石天尊神女壇壇側有竹
垂枝若簋有槁葉因風落壇上竹則因風掃之終歲瑩
潔不為所污楚人世祀焉 咸通末歲今翰林舍人蘭
陵蕭公邁自右史竄黔南秋八月二十七日泝三峽次
秭歸時蜀水方漲橫濤蔽目公積悖而寢夢神人赤髮
碧眸且云險不足懼公異之再寐又夢公詰其所自則
曰我黃魔神也居紫極宮之西北隅將祐助明公出於
北境公曰吾斥去荒徼危殆末已神能惠祐之或以朝

夕期幸與吾俱遊息吾不敢忘亟言之神許諾自是抵
於黔又遷於羅每陟險艱神恍如在洎公遷於朝神夢
告歸公曰將設廟列塑於宮之傍丁酉歲公從弟執自
澧陽尹亞西蜀路出祠下以囊金致公意謂前制不專
請別修敬太守清河公承命感異親營之心匠既陳層
軒以新神樂來斯靈儀蹲蹲按靈寶經南方有大魔其
中央曰黃天魔王橫天擔力謂能力扶昊蒼周覆萬有
天其或者以公有弘濟之業將扶危定傾作鎮天步俾

黃魔降鑒為公之兆朕乎噫天為功必藉於大賢神之
靈固輔於有德是必有鴻猷盛績萃於公之身未可知
也循以學官謫秩歸奉太守命弗敢讓所記乾符丁酉
歲仲春九日司戶參軍袁循記按黃魔神即雲華夫人
之使也故得附見

真誥云秦時有巴陵侯姜叔茂者來往句曲山下種五
果并五辛菜今名此地為姜巴注云秦時未置巴陵縣
此是巴蜀之巴也

後漢王遠字方平東海人舉孝廉除郎中明天文圖識
學桓帝問以灾祥題宮門四百餘字帝令人削之墨入
板裏後去官隱去魏青龍初飛昇於平都山見廣成先
生神仙傳 按平都山今之酆都縣也又新都志方平
常採藥於縣之真多山有題名云王方平採藥此山童
子歌玉爐三澗雪信宿乃行

獨角者巴郡人也年可數百歲俗失其名頂上生一角
故謂之獨角或忽去積載或累旬不語及有所說則旨趣

精微莫能測焉所居獨以德化亦頗有訓導一日與家
辭因入舍前江中變為鯉魚角尚在首後時時暫還容
狀如平生與子孫飲燕數日輒去 按渝州圖經仙池
在州西南江津縣界岷江南岸其池周迴二里水深八
尺流入岷江古老傳聞有仙人姓然名獨角自揚州來
居此池邊起樓聚香草置樓下獨角忽登樓命僕自下
起火乃飛空而去因名仙池見有石巖一所向岷江西
面在

司馬紫微集七十二福地第四十五平都山在忠州是陰真君上升之處雲笈七籤云陰長生者新野人漢和帝永元八年三月己丑立皇后陰氏即長生之曾孫也少處富貴之門而不好榮位潛居隱身專務道術延光末聞有馬明生得度世之道入諸名山求之到南陽太和山中得與相見乃執奴僕之役親運履舄之勞明生但與之高談榮華當世之事治生園圃之業十餘年長生未嘗懈怠同時有共事明生者十二人皆怨恚歸去

獨長生禮敬彌肅而明生數因言語得失之際屢罵之
長生乃和顏悅心奉謝不及如此積二十年後清閒之
日明生問其所欲長生跪曰惟乞生爾今以糞草之身
委質天匠不敢有所汲汲憚於遲速也明生哀其語乃告
之曰子真能得道者也乃將長生入青城山中煮黃土
為金以示之立壇軟血即日以太清金液神丹授之欲
別去長生乃叩頭陳謝暫留仙駕拜辭曰弟子少長豪
樂希執卑遜刻身勵己若臨冰谷不能弘道讚德宣暢

妙味徒尸素壁立而老耄及之是以心存生契捨世尋
真天賜嘉會有幸遭遇自執箕箒二十二年常懼毀替
恩養不酬夙夜感慨告以更生頓受靈秘是將灰朽質
蒙延續之年炎林焦草惠膏澤之霑若絕烝獲其蘇息
瞽闇開其視聽感荷殊戴非陋詞所謝昔太歲庚辰聞
先生與南嶽真人洪崖公雲成公瀛洲仙女數人共坐
論傳授當委絹之誓有交帶之盟應祭九老仙都九炁
丈人諸君禱祠授之大藥乃靈不祭而受為之不成弟

子預在曲室嘗侍帷側亦具聞諸仙起末得道之言說
肯受丹節度矣先生今日見諭不復陳此或非先生所
受之不盡將恐是弟子困窮爾馬明生慰諭之曰非有
不盡汝性耽玄味專烝而和靈官幽鑒已久相察不復
煩委為俗人之信耳於是長生入武當山石室中合丹
但服半劑不即升天而大作黃金數萬斤以布施天下
窮乏不問識與不識周行天下與妻息相隨舉門皆壽
後委之入平都山白日升天其臨去作詩二篇書九篇

詩曰維余之先佐命唐虞爰逮漢世紫艾重紆予獨好
道而為匹夫高尚其志不事王侯貪生得生亦又何求
超迹蒼霄乘飛駕浮青要乘翼與我為仇入火不灼蹈
波不濡逍遙太極何憂何慮遨戲仙都顧閔羣愚年命
之逝如彼波流奄忽未幾泥土為儔馳走索死不肯斃
休予之聖師體道知真昇騰變化松喬為鄰又云維予同
學一十三人寒苦求道歷三十年中多怠惰志放六經
辟世自匿二十餘年名山之側寒不遑衣飢不暇食思

不敢息奉事聖師承顏悅色面垢足胝乃見哀識遂傳
要訣恩深不測妻子延年咸享無極黃白已成貨行不
慳痛乎諸子命也自天天不妄授道不缺歸賢勤加精研
勿投幽壤何時可還嗟爾流俗富貴所牽神丹一成乘
彼九天壽同三光何但億千又維予垂髮少好道德棄
家隨師東西千億役使鬼神玉女侍側予得度世神丹
之力黃庭堅題其後云忠州平都山仙都觀朝金殿西
壁有天成四年人書陰真君詩三章余同年許少張以

為真漢人文章也余考之信然因試筆偶得佳紙為鈔
此詩與王瀘州補之季子觀陰君所學守屍法耳猶須擇
師勤苦如是乃能得之何況千載之後尚友古人求知
道德之真宰者乎陰仙自序其書略曰上古仙者多矣
不可具記而論但漢興已來高士得仙者四十五人迨
予為六矣二十人見尸解去餘者白日升天焉弟子丹
陽葛洪曰諺言不夜行則不知道上有夜行人今不得
仙者亦安知天下山林間密自有學道得仙者耶陰君

已服神藥雖未升天然方以類聚同聲相應便自與仙人相尋求聞見故知此近世諸仙人之數爾而俗人謂為不然已所不聞則謂之無有不亦悲哉夫草澤閒士以隱逸得志經籍自娛不擢文彩不揚名聲不修求友不營聞達猶不能識之又況仙人亦何急令朝菌之徒知其所云為哉 按仙都山陰君洞驗記云君將欲昇天謂門人劉玄遠曰此山孤峙勢若龍蟠其首東向必當吐雲送我言訖有五色雲從地湧出乘雲昇天出雲

之處呀成洞穴水旱祈禱立有感通大厯九年七月十日邑人宇文萬年女人阿忤等一十五人以元節之晨奉香花於洞門禮拜忽見洞中波濤湧溢出一金手一玉手其大如扇良久乃隱水波亦不復見長慶元年江陵人傅緡聞洞中雷吼之聲咸通初道士王芳芝聞洞中聲如羣鳥飛異香紛郁徧於山頂鄉人常以之占歲鶴翔必致於年豐鹿鳴必致於歲歉不棲凡鳥每有二鳥廣明辛丑歲刺史陳旼修置道場有祥雲天樂之

應甘露泣於叢林寵詔褒美中和甲辰年賜紫大德曹
用言准詔齋醮有卿雲瑞雪之祥時既畢黃錄道場未
撤門簾有神人見曰雲山齋醮必命神祇主張我即近
廟之神差衛壇壝齋功既畢門簾未移我不敢輒還本
廟道衆聞言覩異遽折門簾其神見形覬謝而去

列仙傳邗子者蜀人也好畋獵知相犬犬走入山穴中
邗子隨入十餘宿行度數百里乃至一山上有臺殿宮
府松栢森然仙吏侍衛甚嚴見故婦主洗魚與邗符一

函使還與成都令橋君發函有魚子也著池中養之
一年皆為龍邗復送符還山上其犬色更赤有長翰常
隨邗往來百餘年遂留止山上時下來護其宗族蜀人
立祠穴口常有鼓吹傳呼聲西南數十里共奉祠焉

按道篇記昔蜀邗子已成丹不能出神有仙童來告曰
月生之月君之親族猶有不禁者陰德未遠故遲君成
仙期耳邗子於是家書一紙與之明年蜀大疫邗子親
族無一人染者子及緝柳編所載雞生於寅正月食雞

者奪筭豕生於卯鴨生於辰魚生於巳螭生於午蝦生
於未鰲生於申鶩生於酉犬生於戌蟹生於亥羊生於
子牛生於丑當其月食之俱不利此即仙童月生之說
也華陽國志巴郡名山有石書邠山即邠仙逐犬處也

華陽國志江州郡塗山有禹廟及塗后祠祠北水有銘
書祠云漢隄為張君為太守忽得仙道從此升渡今民
曰張府君祠

涉正者字玄真巴東人也說秦始皇時事了了似及見

漢末從數十弟子入吳而正常閉目雖行猶不開弟子
隨之數十年莫有見其開目者有一弟子固請之正乃
為開目目開有聲如霹靂而光如電照於室宇弟子皆
不覺頓躋良久乃能起正已復還閉目正道成莫見其
所服食施行而授諸弟子皆以行炁房室及服石腦小
丹云李八百呼正為四百歲兒

萬縣志云楊卓者魏文帝時人居木樨山修煉山有池
水色如乳卓飲之上昇一云卓菴道人在西山絕塵龕

上脩道蛻去有巨人鎖子骨在焉

梁山蟠龍洞碑云張卞者為蜀先主將因諫先主伐吳
不聽入山遇樵叟自稱鴟夷人授以丹訣修煉洞穴莫
知所終

晉杜蘭香別傳曰杜蘭香自稱南陽人以建興四年春
數詣張傳傳年十七望見鈿車在門外婢通言阿母所
生遣投配君君何不敬從傳先改名碩碩呼女前視可
十八九說事邈然久遠其婢子二人大者萱支小者松

走鈿車青牛上飲食皆備作詩曰阿母處靈岳時遊雲
霄際衆女侍羽儀不出墉宮外飄輪送我來豈復恥塵
穢從我與福俱嫌我與禍會至其年八月旦復來作詩
曰逍遙雲霧開呼吸發九疑流沙不稽路弱水何不之
出著顓子三枚大如雞子云食此令君不畏風波辟寒
溫碩食二欲留一不肯令碩盡食言本為君作妻情無
曠遠以年命未合小乖太歲東方朔當還求君 征途
記曰張碩與杜蘭香相別後於巴縣見一青衣云蘭香

在白帝君所若聞白帝野寺鐘聲隨風而來則蘭香亦隨風而至際夜果聞鐘聲蘭香亦至焉

重慶志云徐神翁者常居樂溫之北真觀相傳神翁於此飛昇去今觀之右有飛仙臺仙人跡尚存後人有仙翁去後留蹤跡丹灶沉沉鎖翠烟之句題咏甚多

宋岑象禹州虛鑒真人岑公洞記云周文王異母弟耀之子渠成王封諸岑古梁國岑亭是也漢魏而下隸南陽棘陽縣今唐州胡陽西北四十里有棘陽城蓋岑世

家於此黨錮起公避地鹽官又為鹽官人其後去梁居江陵隋末天下亂公泝江逃難至南浦愛龕巖遂止其下片衣粒米悉無所營晏坐凡二十年兀然逝去郡人慕之塑像龕間世世奉侍無懈唐獨孤霖段文昌皆為文記公之德熙寧十年夏五月大旱靡神不舉久靳膏澤守臣詣公懇禱即日雨大霑一境霑足部刺史表其事天子嘉之優詔賁飾贈公虛鑒真人公之道遂大昭著竊原公去世餘六百歲名迹幾泯一旦神靈顯發稱

謂與莊老文列等其故何也請以宗姓言之光武起宛
葉征南以才武奮兵行如神所向無不風靡位參四七
之列梁武苦於奉佛寶唱以術業敷揚祕典首載僧史
東晉僧猛以孤節卓行冠比邱尼唐太宗經營洪業中
令景仁以清材與識為房杜亞夫或迹耀清簡或名標
寶藏皆事暴一時譽高當世岑公趣向惟清虛靜默未
嘗有一言垂後寂滅已久而隱德升聞膺此褒錄聲實
暴白與嶺雲江月輝映三峽品目高遠迨非偶然蓋征

南以功唱以學猛以行中令以才而公以道修蘊涵蓄
深淺不同故其報有崇卑久近之異無足恠也郡守蓋
君休璟謂予忝預末派使來求文故為述其由來繫以
贊云虛造冲漠兮鑒察幽隱秉德既然兮錫號惟允靜
無所營兮動無所蘊稽神靈之顯發兮庸詎非道力之
強賢公居此巖二十年兮萬人奉公也甚莊公去此巖
二十世兮萬人思公兮未央孤雲投壑兮謂公之袂落
霞垂岫兮想公之棠公乎曷歸兮儼遺像於岩房望崆

峒之遼邈兮謾傳廣成之修煉顧石室之依然兮深悵
赤松之弗見念餘派涓涓其不泯兮振起奚望於孤生
惟真迹之綿綿兮無預海田之變元符元年六月三日
朝請大夫知襄州軍州兼管內勸農事兼提舉房隨郢
州兵馬巡檢公事柱國偕紫岑象象求撰 按蜀志補
遺云岑公洞在萬縣隋末岑道願尸解於此陸游詩大
業征遼發問左軍興書檄煎膏火此時也復有閒人自
引岩泉拾山果

黃姑者唐貞觀家於萬歲縣古城東五里白馬渡南岸乃黃道士之女也因洗菜江干見青衣數童子持青旄白馬揖請攬轡者數姑却歸語其嫂嫂異之翌日姑嫂偕至舊所童馬亦然嫂曰試諸姑方攬轡上馬即登天而去俄頃五色雲氣結於東山郡人皆知遂號東山曰神仙山唐太常卿吉於渠為守作小姑步虛詞十九篇

唐閭邱師姓杜氏開元中居銅梁山得玄修靜養之術

山上有洞深丈餘內有石床可坐十餘人傍有石室丹
臺靈泉邱寓此十餘年訪其所善蓬州太守於公署越
三日告還行十餘里不見惟有笠蓑懸樹是日已在銅
梁山矣尋脫化去今石室丹臺碁局石磴尚存宋周茂
叔程伊川及眉州三蘇相繼遊之多題咏

唐女冠范志玄天寶間修煉於合州北之純陽山時朝
使任安至慕其姿容命盧姓者通好志玄不從任君怒
欲焚其廬陽許之擇日具禮親迎至山麓至玄化為男

子騰雲而去人追至十餘里外望入雲門不及而還
按宋劉儀鳳詩云誰家游冶郎門首窺香闥但見臉如
花不知心似鐵一夕變其軀雪質映紺髮昔為桃李花
今作松筍節

韋昉蜀人嘗夜渡涪江忽遇龍女遣騎迎入宮後昉登
第知簡州罷歸日龍女復遺書相迎勅命昉充北海水
仙見景煥閒話

紫房真人世傳壁山人未詳其名氏唐時隱居茅來山

得玄修之術後遊方外莫知所終今茅來恭天觀之側
有恭天洞存 按重慶志云趙延之大厯中為巴州令
時資瀘夷寇掠縣境延之率民兵襲破之以功授合州
刺史兼渝合資瀘經略安撫使其後挈家入茅來山恭
天洞修煉今銅梁縣西有望仙橋志言土人於此望延
之仙去也一說延之死為壁山神今廟在巴縣重壁山
宋時封感烈侯而壁山縣靈壁廟亦祀之

仙傳拾遺云翟乾祐雲安人也龐眉廣額巨目方頤嘗

於黃鶴山師事來天師盡得其道能行氣丹篆陸制虎豹水伏蛟龍雲安井自大江沂別派凡三十里近井十五里澄清如鏡舟楫無虞近江十五里皆灘石險惡難於沿沂乾祐念商旅之勞於漢城江上結壇考召遠近犀龍凡一十四處皆化老人應召而至乾祐諭以鴻浪之險害物勞人使皆平之一夕之間風雷震擊十餘里盡為平潭矣唯一灘仍舊龍亦不至乾祐復嚴勅神吏追之又三日有一女子至焉因責其不服應召之意女

子曰某所以不來者欲助天師廣濟物之功耳且富商大賈力皆有餘而傭日負運者力皆不足雲安之貧民自江口負財貨至於井潭以給衣食者衆矣今若輕舟利涉平坦無虞則邑之貧民無傭負之所絕衣食之路所困者多矣所以不至者理在此也乾祐善其言因使諸龍各復其故風雷頃刻而長灘如舊唐天寶中詔赴上京恩遇隆厚歲餘還故山尋得道而去 按酉陽雜俎云翟天師峽中人長六尺手大尺餘每揖人手過胸

前卧常虛枕晚年往往言將來事常入夔州市大言曰
今夕當有八人過此可善待之人不知悟其夜火焚數
百家八人乃火字也每入山虎羣隨之曾於江岸與弟
子數十翫月或曰此中竟何有翟笑曰可隨吾指觀弟
子中兩人見月規半天瓊樓金闕滿焉數息間不復見
又按唐韋德融雲安洞靈觀翟天師記天師姓翟名
法言字乾祐夔州雲安西縣玉石鄉人也本命乙卯生
於有唐開元三年少好玄門性親道藝茹清素不食五

辛住山院而齋潔焚修遠世寶而纖塵不染天寶十四
載乙未歲年四十一矣四月七日夜因溪水泛漲柴木
併流雨歇多時爽然晴朗法言夢見霍童來報曰二真
人傳語三洞來日辰巳間可來溪畔相尋自有靈丹秘
錄相奉事須在留意無使過日言訖天師驚覺猶見童
形驚嘆不已乃獨攜一斧尋溪求薪二真人已在溪側
石盤上東西而坐對碁同喚曰法言來也西坐仙語東
坐請分付法言秘錄東坐荅曰時未至法言稽首設禮

次二真人拂袖而起曰汝但來雲昇宮相趨傳汝三般秘籙俄頃雲霧冥晦忽然不見後三召而役使乃賜藥一貼內有一百二十餘丸以一小合盛之云此藥每遇正旦以酒服一丸可如數壽命又於石盤上新畫碁盤處遺一黑二白碁子三枚須臾二真騰空而去法言遂歸本家香湯沐浴尋時便赴雲昇朝禮尊像只聞房內有人談經之聲稱云法言已來可付秘章也法言設禮畢二真人云此山西池有五龍居之仰領肘後召嵩秘

章一冊計百二十通

缺

法言既得二物再拜禮謝二真

人語之曰吾亦非妄要傳子緣汝名標仙籍近檢靈異
經記分明具載汝但服食此藥更能修真煉氣即可上
朝諸天真君有間大須努力又當普濟貧乏是為妙行
既而曰弟子可歸他日有請即來也勉志修煉於是法
言獨於殿內開覽所得祕章三科一是三將軍祕術二
是紫虛祕術三是太上正一明威畢法其內各有醮煉
科儀兼題云法言得此祕錄便當捨棄俗宅別建淨宅

潔志修行方與道契於是遂置一小院居玉石村側依
所注科儀七祭七煉感二真人與日月星辰夜降其戶
從此道行馭役鬼神護民救世至慶德三年己巳歲荆
南節度使王玘親至雲安傳授秘籙乃令縣司立小壇
并所指館舍斯觀是焉先是雲安鑿五井成衆迎天師
作頌誓其水曰雲昇五龍付吾管領分之一龍治此一
井雖有大江清濁無定衆所共需龍宜護淨用善一方
天地同永誓訖特召一龍專治觀前之井故其水甘冷

異常一境之人賴焉初王玘以十月朔日半夜升壇拜
受天師秘法是夕感太宗皇帝夢荆南節度使王玘將
三神人周遊天下其明日特差中使馬承靜急徵王玘
歸闕問以所夢之因玘奏言臣近屬之內夔州西縣有
玄士姓翟名法言善三將軍秘錄臣要保命是夜傳度
斯法非敢他謀帝嘆其神仍賜玘錢一百貫綾絹各二
十疋又頒手詔曰朕為六甲殿門失去金鑰累令治工
開之不得緣內有金箱玉簡其殿宇係七寶合成不欲

毀損卿既稱管內道士翟法言藝術孤高可為朕遣至
以術開之也玆既准勅命與監押使胡匡祚馳歸差入
船就雲安軍迎天師到荆南與前同行赴闕法言既登
塗感長安土地神差鬼使以朱鬣白馬至七日程遠迎
天師將至勅旨令道侶郊候歸大內安下是日朝見畢
乃賜坐帝問曰朕為六甲殿門不開已是二百餘年道
人可開得否奏曰此是小事不難於是以酒喫殿門廊
開其日金箱玉簡俱現函上有一篆是金縷書之題云

此殿遇翟者開帝大悅賜號通虛天師及頒章服旬日後辭歸薨駕禮餞郊外天師復奏曰伏見殿內有少微穴請以炭萬斤燒赤於殿上作河置炭其中令后妃太子俱渡河可禳也後如法禳有驗是日京城佩章服大師皆隨駕祖餞天師以所將淨巾放在御食案上諸大師曰翟法言是巴峽小師擅將淨巾放在御食案事當不敬乞陛下裁決法言曰玄門之內法高為先若今日對御諸大師能捻得法言淨巾起即當北面禮大師或

捻之不起則當為法言弟子帝乃令諸大師揭其淨巾若粘在案併力揭之不得法言自揭應手而起諸國師奉帝命禮法言為師次各粘在本坐處起身不得默而不言帝乃大笑謂天師曰如何法言奏曰令起不難略與諸大師小戲耳乃喝令起諸大師始起立遂皆跪禮天師願為弟子既離長安止三日到荆南玘復馳奏之乃勅加通天大師之號修傳錄之壇永為陰陽靈山之瑞也方天師在京日慈母何氏為虎所傷既歸至雲安

乃親詣雲昇西北大歇堂傍是母被傷處結壇三晝夜
行符布召殺母之虎是夜土地神領虎而至白天師曰
母何氏宿生合管八難之數去年十二月九日奉閻羅
王勅命令獸來畢師母之命非敢自專天師曰我母既
係八難奉天符而殺只合過命豈得便食其肉據此合
有罪無遂以鐵鞭決虎數十放去其地因名伏虎岡焉
自後天師專以救民為務行符錄而除疫癘煉黃白以
施貧家大和七年癸丑歲十二月一日召衆弟子謂曰

將取今月五日昇遐朝謁諸天真君可與法言疊一石
墳拜造方棺一具上蓋一片帳應曰諾師仍留下水符
一百二十道令貼在身者可壽一百二十也至日沐浴
了處分但於五日指揮及不得閉蓋墓門一日三時須
得揭棺看吾顏色於是弟子冉善之等一依天師囑付
葬送未逾一日至黃昏時忽聞半天有鐘鐸聲喧闐宣
祭拜見五色之雲繚繞天際師在其上語弟子曰汝等
修煉至道宜在勉旃言畢而沒不復可見遂往墳內揭

棺視之止遺所著履一隻墳今在觀之東北焉天師既
謝世經一十二年有舊識李文盛往西川見天師於市
肆中置酒共話宛然如故云吾暫往青城飄然而去德
融學雖淺薄久附師顏一依目擊躬際緣由直書永以
為記讚曰天師仙籍名標係方得真人來感契付度秘
章三要科件件依收陳七祭日月真人同降戶二物遺
條明示誨因茲道法轉孤高遠近居人皆頂戴立壇傳
法授王臣夢感聖君人警戒徵書直入內宮中百辟迎

逢加禮待一嚙六甲殿門開并渡炭河消恠害金箱玉
簡顯然逢兼有篆文明所載蒙恩賜紫號通靈頒及章
衣親禮拜辭天命駕返夔門聖主躬親送郊外不逾三
日到荆南奏上方知促地界重加帝澤號通天法藝精
金誰可會忽然鐘鐸遠來迎獨步綵雲朝上帝

酉陽雜俎有道士佯狂俗號為灰袋翟天師晚年弟子
也翟每戒其徒勿欺此人吾所不及嘗大雪中衣布褐
入青城山暮投蘭若求僧寄宿僧曰貧僧一衲而已天

寒如此恐不能相活但言容一牀足矣至夜半雪深風起僧慮道者已死就視之去牀數尺氣蒸如炊流汗袒寢僧始敬異天未明不辭而去多住村落不逾信宿曾病口瘡不食數月狀若將死人素神之因為設道場齋散忽起就謂衆人曰試窺吾口中有何物也乃張口如箕五藏悉露同類驚異作禮問之唯曰此足惡此足惡後不知所終

北夢瑣言唐乾寧中雲安縣漢城宮道士楊雲外常以

酒自晦行止異常前進士錢若愚甚敬之一旦薰沐詣其山觀宿於道齋翌日虔誠斂衽而白之曰師丈小子凡鄙神仙之事雖聆其說果有之乎楊曰有之我即其人也尋示以飛空躡虛履水蹈火之術於是郡日千萬人來就看因騰躍上昇冉冉在空中良久而下若愚稽顙自是信有神仙事按唐商真君飛昇記雲安風俗淳厚陶染真風如瞿法言楊雲外之徒繼出故琳宮秘館獨盛它處

唐姚道真合州石照人捨家得道俗謂之姚仙自言咸通末從呂洞賓往來傾藥十二丸授之得仙也

五代史補云余朱先生忘其名蜀人也功行甚至遇異人與藥一丸先生欲服異人曰今若服必死未若見浮石而後服之則仙道成矣先生如其教自是每遇石必投之水欲其浮如此者殆一紀人皆以為狂或聚而笑之而先生之心愈堅居無何因遊峽上將渡江有叟艤舟相待先生異之且問曰叟何姓氏對曰石氏此地何

所荅曰涪州先生豁然悟曰異人浮石之言斯其應乎
遂服前藥即輕舉矣 按李石續博物志爾朱先生偽
蜀廣政中飲酒食猪臠渝川刺史謂其幻惑以竹籠沉
之江至夔為漁人所得上昇 又按張商英介朱仙傳
先生名通微自號歸元子一日徧遊成都新都廣都間
至暮仍還丹室有日遊三都夜宿金雞之諺東坡志林
云介朱道士客涪州愛其所產丹砂雖瑣細而皆矢鏃狀
瑩徹不雜土石遂止煉丹數年竟於涪之白石仙去

北夢瑣言偽蜀時巫山高唐觀道士黃萬戶本已東萬戶村民學白虎七變術又云學六丁法於道士張君常持一鐵鞭療疾不以財物介懷然好與鄉人爭訟州縣不知重也戎州刺史文思輅亦有戲術曾翦紙魚投於盆內而活萬數復授符化獺而食之其鐵鞭為文思輅收取歸至涪州亡其鞭而却歸黃矣有楊希古來傳其術坐未安忽云子家中已有喪穢不果傳俄得家訃母亡又蜀王建召入宮列諸子示之俾認儲后萬戶乃指後

主其術他皆倣此唯一女為巫山民妻有男傳授秘訣
將卒戒家人勿殮經七八日再活不久即殞也青城縣
舊有馬和尚宴坐三十五年道德甚高萬戶將卒謂家
人曰青城馬和尚來遂長逝矣是年馬師亦遷化

錄異記云黃萬祐者修道於黔南無人之境界累世常在
每三二十年一出成都賣藥言人災福無不神驗蜀王
建迎入宮盡禮事之問其服食皆祕而不言曰吾非神
仙亦非服餌之士但虛心養氣仁其行黜其過而已問

其齒則曰吾只記夜郎侯王蜀之歲蠶叢氏都郫之年
時被請出爾後烏兔交馳花開木落竟不記其甲子矣
忽一日南望嘉州曰健為之地何其火炎請遣人赴之
如其言使至嘉州市肆已為瓦礫矣後堅辭歸山建泣
留不住問其後事皆不言既去於所居壁間題曰莫交
牽動青豬足動即炎炎不可撲驚獸不欲兩頭黃黃即
其年天下哭智者不能詳之至乙亥年起師東取秦鳳
諸州報捷之際宮內延火珍寶帑藏並為煨燼乃知太

歲乙亥是為青猪應焚爇之期也後三年歲在戊寅土而建俎方知寅為鷩獸戊寅納音俱是土土黃色是以言鷩獸兩頭黃也按萬祐疑即萬戶音同而事頗類錄異記云夔州道士王法玄舌大而長呼文字不甚典切常以為恨因發願讀道德經夢老君與剪其舌覺而言詞輕利精誦五千言頗有徵驗一本作王法朗未詳王帽仙不知何許人寓居涪州嘗出入闌闔為人修敝冠號王帽子暮則宿於天慶觀一夕尸解而去道士為

葬之月餘自果山貽書來謝人始知為仙

覃佺忠州人幼在洞真觀學道清苦得解悟年八十過倚天山仙洞之西見水菰語二童子曰此吾休息之所遂刻珉為室越二年攜友至室歌咏暢飲羽衣而化

按倚天山在忠州東南六十里

宋趙覺者未詳何許人修煉於合州之東山嘉祐中冲舉而去今山頂有飛龍觀石寶丹井井不盈尺常乾水可愈疾人欲取之以淨巾覆口默禱少頃水自滿又有

禮斗臺今石上衣佩履跡見存

鄧都道士未詳何許人元大德戊戌棲隱雪峰山歲乙卯召集道友曰吾化矣大道坦然皎如日月雖由人弘豈隨人往諸生宜遵道而行毋令半途而廢偈曰朴庵寄住有年東西南北依然裏面渾無一物只有玄文數篇今日草茅朽腐須要改換棟椽眼底風波太惡不容久住山巔選得幽居去處和區移上六天端坐而逝

蜀中廣記卷七十五